



«Vias e viafiers è bun. Ma nus duvrain er investiziuns federalas en strategias da digitalisaziun.»

FOTO OLIVIA AEBLI-ITEM

# Dapli megabits e gigabits per la muntogna

Ina rait d'internet svelta surtut per il territori da muntogna ed ina strategia da spectrum lartg per tegnair pitg al svilup da la digitalisaziun: Dus postulats che cusseglier naziunal Martin Candinas ha inoltrà cun l'argument da las schanzas equalas per il territori muntagnard. La critica dals adversaris da 5G encunter las antennas da telefonia 5G na sajan betg giustifitgadas, di Martin Candinas en il discurs cun la FMR.

MARTIN GABRIEL/FMR

**FMR:** En Vossa moziun inoltrada pretendais Vus dal Cussegl federal in internet svelt per il territori da muntogna. Il Cussegl federal ha refusà questa moziun. Ed il Cussegl dals chantuns ha sistì questa tractanda. Ed uss?

**Martin Candinas:** L'atun passà ha il Cussegl naziunal acceptà mia moziun cun 176 cunter 2 vuschs. Avant la debatta en il Cussegl dals chantuns han ils responsabels da la Swisscom pretendi che la realisaziun da mia moziun metta la Swisscom en grondas difficultads finanzialas. Ils gestiunaris da raits da cabels han sin quai cumbatti mia moziun cun tutta forza. Ed il Cussegl dals chantuns ha lura sistì mia moziun cun l'argument da vulair dapli infurmazioni en chausa. Per las regiuns da muntogna e per la periferia è quai stà ina gronda trumpana. La cusseglier federala *Simonetta Sommaruga* ha questa primavaira signalisà da vulair ademplir mia moziun cun na pretender nagut dals gestiunaris da raits da cabels e cun far pliras excepiuns a l'adressa da la Swisscom. Enfin la fin da quest onn duess la proposta concreta dal Cussegl federal esser sin maisa. La realisaziun duai succeder ils proxims onns. Jeu sun spanegià sin las discussiuns che suondon. I fa propi prescha. Per mai vai memia plaun, dentant almain en la dretga direcziun!

**Vus avais er deponì questa primavaira in postulat en connex cun l'internet svelt e demandais il Cussegl federal da preschentiar ina strategia dal spectrum lartg.**

Il svilup tecnic è creschì ils davos onns. Perquai hai jau - suenter il success cun 10 megabits da l'onn 2016 - inoltrà ina nova moziun per in augment sin 80 megabits per secunda. I dovrà ina clera strategia naziunala per l'internet spert. Sche nus na faschain betg quai vegn il foss digital adina pli grond. Jau sun fitg persvadi che questa situaziun cun differentas purschiudas tranter citads e territori da muntogna na corrispunda er betg al «service public». Il Cussegl federal sto cumprovar co el vul realisar

## «I dovrà betun, dentant adina dapli er megabits e gigabits»

Martin Candinas, cusseglier naziunal

l'internet spert a favur da l'entir pajais. I dovrà davart da la Confederaziun ina offensiva finanziala per l'infrastructura d'internet. Quai dentant mo en ils lieus nua ch'il martgà na funcziuna betg. Per ordinari èn quai ils lieus en la periferia ed en la muntogna.

**En il Grischun datti gronda resistenza cunter las antennas da 5G. Tge connex datti tranter 5G e l'augment dals megabites?**

Adina pli savens vul la Swisscom porscher ses servetsch d'internet sur las antennas, saja quai 4G ubain 5G. Per mises ed alps è quai franc ina buna opziun. I na po dentant betg capitär che vischnancas e fraciuns vegnan tractadas sco mises ed alps e colliads mo entras las antennas. 5G è ina realitat d'enorma impurtanza per noss avegnir digital. Cun impedir antennas faschain nus donn a nus sezs. I dovrà omaduas tecnologias. A chasa duai l'internet vegnir via cabel, sin viadi sur l'antenna.

**Pudess l'augment dal provediment fundamental en direcziun 80 megabites dentant vegnir chapì fallà dals adversaris da 5G?**

Ils adversaris da 5G ston avair plaschair da mias pretensiuns per l'internet svelt via cabel. Senza questas investiziuns datti duas alternatiwas: L'internet sur antennas u nadin internet. Da la vart sanestra ed alternativa hai jau adina g' il sostegn cumplain per mias pretensiuns per in augment dal provediment fundamental. Cler che mes engaschament supplementar per 5G n'è betg bainvesì dapertut. In mund adina pli digital pretenda dentant investiziuns sin tut

ils secturs tecnologics. Gia en paucs onns è 6G il grond tema.

**Co stat quai cun la cumpatibilitad dal spectrum lartg cun effizienza d'energia ch'è gea in postulat central da la strategia d'energia 2050?**

Dapli consum muta era dapli consum d'energia. En las citads gioga il martgà tranter ils furniturs mordio. Qua vegn purschì enfin 10Gbit per secunda, damai in internet ch'è 1000 giadas pli svelt che noss provediment fundamental. La dumonda è simpla: Vulain nus renunziar a l'internet svelt, fertant che tal vegn purschì en ils centers da la Svizra da tut temp, e quai da plirs furniturs? Mia resposta è NA. Politica d'energia na po betg vegnir fatga a cust da la populaziun da muntogna. Nus guardain la fin finala che l'electricitat vegnia producida cun energia regenerabla. Tant pli essan nus obligads da far diever da nossas resursas cun saun giudizi.

**La nova strategia dal spectrum lartg duai vegnir realisada ils proxims 8 fin 10 onns. È quai realistic?**

La pretensiun da formular ina strategia dal spectrum lartg n'è betg il davos ina consequenza da la politica dals davos onns. Il Cussegl federal n'ha mai vulì agir. Uschia na po quai dentant betg ir vinavant. Per mai èsi cler che la strategia dal Cussegl federal sto esser enconuschenta aifer in enfin dus onns. Sche la Confederaziun fa investiziuns ston ils instruments correspondents vegnir elavurads e la finanziazion reglada. Questa missiun ch'il parlament sto exequir en la proxima legislatura dovrà bler temp. En 8 fin 10 onns stuain nus en tutta cas vesair ils emprims resultats da la strategia. Nus discurrin cun raschun bler davart investiziuns en projects da vias e viafiers. En l'avegnir ston dentant era las investiziuns finanzialas en las raits digitalas survegnir ina muntada sumeglianta. I dovrà betun, dentant adina dapli er megabits e gigabits!